
ՆԱԽԸՆՏՐԱԿԱՆ ՊԱՅՔԱՐԸ ՎԱՆՈՒՄ ԵՎ 1908 Թ. ԽՈՐՀՐԴԱՐԱՆԱԿԱՆ
ԵՐԿՐՈՐԴ ԸՆՏՐՈՒԹՅՈՒՆՆԵՐԸ
ՕՍՄԱՆՅԱՆ ԹՈՒՐԹԻԱՅՈՒՄ

ԱՎԵՏԻՄ ՀԱՐՈՒԹՅՈՒՆՅԱՆ

Երիտթուրքական շարժման սպառնալիքների ներքո սուլթան Աբդուլ Համիդը 1908 թ. հուլիսի 10-ի հրովարտակով նորից գործողության մեջ է դնում 1876 թ. Միթհատյան սահմանադրությունը և հրամայում անցկացնել մեպուսանի կամ երեսփոխանական ժողովի ընտրություններ, որին հավասարապես մասնակցելու իրավունք էր վերապահվում ինչպես մահմեդական, այնպես էլ ոչ մահմեդական հպատակներին: «Մահմանադրականներուն պայքարը, – ինչպես Ե. Օտյանն է բնորոշում, – տեղ մինչև Օսմանյան սահմանադրության հռչակումը... Մահմանադրականները վերջապես հաղթանակեցին»¹:

Եվրոպական պետություններին ուղղված 1908 թ. հուլիսի 31-ի հայտարարության մեջ, երիտթուրքերը, երեք առանցքային խնդիրների իրականացման գործում, կարևոր էին համարում նաև 1876 թ. սահմանադրության վերահաստատումը. « ա) Պիտի խուսափինք ավելորդ արյունահեղություններ, բ) մեր պահանջն է 1876-ի Մահմանադրության վերահաստատումը, գ) Օսմանյան բոլոր կրոնները և ցեղերը հավասար կը նկատենք ու բանակը պիտի պաշտպանե երկրին անձեռնմխելիությունը»²: Ինչպես Նիազի բեյն էր նշում 1908 թ. հուլիսին, «Կ'երդնում խտրություն չդնել ո՛չ ցեղի և ո՛չ կրոններու դեմ: Իմ դրոշակիս վրա գրված է «Ազատություն և ճշմարտություն»: Կը հուսամ որ բոլոր Օսմանցիները արժանի մեծ համակրությամբ պիտի ողջունեն այս շարժումը և պիտի պաշտպանեն այս խոսելը, որուն համար ուխտած ենք կովիլ»³:

Երկրում երեսփոխանական ընտրություններ անցկացնելու մասին սուլթանի հրամանը հրապարակվեց 1908 թ. օգոստոսի 2-ին, որին հետևեց մեծ վեզիր Սալիդ փաշայի շրջաբերական նամակը, որում, երիտթուրքերի ճնշման տակ, ներկայացված էին օրինագծի որոշ հոդվածների փոփոխման բացատրությունները:

1908 թ. սեպտեմբերին Իթթիհատի կենտրոնական կոմիտեն Սալոնիկում հրապարակած նախընտրական քարոզարշավի իր քաղաքական ծրագրում առանձնահատուկ ուշադրություն էր դարձնում համընդհանուր՝ նոր նախընտրական իրավունքի իրականացման, բնակչության կողմից Սենատի 2/3-ի ընտրության, երեսփոխաններին օրենսդրական նախաձեռնության տրամադրման և ազգային փոքրամասնություններին ընտրական տեղերի հատկացման վրա:

¹ Ե. Օ տ յ ա ն. Երկերի ժողովածու վեց հատորով, հատոր չորրորդ, Երևան, 1962, էջ 427:

² Հ. Գ ա ն գ ռ ու ն ի. Հայ Հեղափոխությունը Օսմանյան բռնատիրության դեմ (1890-1910), Պեյրուս, 1973, էջ 229:

³ Նույն տեղում:

Վ. Թունյանի իրավացի դիտարկմամբ, երիտթուրքերի նախընտրական գործունեության ծրագիրն իր ուղղվածությամբ ուներ դրական բնույթ, քանի որ թույլ էր տալիս առաջընթացի օգտին կատարվող ցանկացած փոփոխության մեկնաբանություն, սահմանափակում էր սուլթանի իշխանությունը և քաղաքական կենտրոնացման հունի մեջ էր դնում Իթթիհատի իշխանությունը: Երիտթուրքական սահմանադրությունը ստանում էր «օրինականացում»⁴:

Նախընտրական օրենքի հիմքում ընկած էր երեսփոխանական պալատի կողմից 1877 թ. մշակված օրինագիծը, որը, սակայն, ժամանակին չէր հաստատվել սուլթանի կողմից և չուներ օրենքի ուժ:

Երեսփոխանական ժողովի ընտրություններին իրավունք ունեին մասնակցելու Օսմանյան կայսրության բոլոր քաղաքացիները՝ առանց ազգային, լեզվական և կրոնական խտրության⁵: Ըստ օսմանյան սահմանադրության, օսմանյան հպատակություն ունեցող 50 000 արական շնչին բաժին էր հասնում 1 պատգամավոր⁶: Ընտրությունը կատարվելու էր գաղտնի քվեարկությամբ և երկաստիճան ընտրակարգով: Բացի նախարարներից, պետական պաշտոնյաները չէին կարող զբաղեցնել պատգամավորական աթոռները: Պաշտոնատար անձր, պատգամավոր ընտրվելուց հետո, պետք է հրաժարվեր իր պաշտոնից:

Ընտրական օրինագծի հիմքում ընկած էին ունեցվածքի, բնակության, տարիքային և կրթական արտոնակարգերը (ցենզր): Համաձայն 1877 թ. օրենսդրության, ընտրական իրավունք տրվում էր միայն այն անձանց, ովքեր պետությանը վճարում էին հողային և եկամտային հարկ, այսինքն՝ ճանաչում էին գույքի արտոնակարգը: Այս ձևը պահպանվում էր միայն առաջին կարգի ընտրողների համար: Իսկ երկրորդ կարգի համար երիտթուրքերը հասան ընտրական շրջանակի մեծացման՝ ընդգրկելով նրանց, ովքեր վճարում էին անասունների և տասանորդի հարկ:

Եթե 1877 թ. օրինագծի համաձայն չէր կարելի պատգամավորության թեկնածությունը դնել այն վայրում, որտեղ թեկնածուն չէր ապրել որոշակի ժամանակ, ապա 1908 թ. բնակության արտոնակարգը վերանում էր: Երիտթուրքերը հնարավորություն էին ստանում իրենց թեկնածուներին ուղարկել երկրի ցանկացած շրջան⁷:

Պատգամավորներ չէին կարող ընտրվել՝ օտարահպատակները, այն քաղաքացիները, որոնք օսմանյան օրենքի համաձայն, օտար ծառայության մեջ լինելով, առանձին արտոնություններ էին վայելում, նրանք, ովքեր թուրքերեն չգիտեին, ում 30 տարին լրացած չէր, ովքեր ընտրության ժամանակ ծառայում էին որևէ մեկի մոտ, ովքեր սնանկացած էին և կամ կորցրել էին իրենց վարկանիշը, ովքեր իրենց նկարագրով արատավորված էին հասարակության մեջ, գտնվում

⁴ В. Г. Т у н я н. Младотурки и Армянский вопрос. Часть первая, 1908–1912 гг., Ереван, 2004, с. 63–64.

⁵ Ա. Ղ ա ր ր ի ն յ ա ն. Հայ ազատագրական շարժման օրերեն (հուշեր 1890 և 1940), Փարիզ, 1947, էջ 178:

⁶ Տ ի գ ր ա ն. Ջ ա վ ե ն. Թյուրք Սահմանադրությունը և երիտասարդ թյուրք կուսակցությունները, Թիֆլիս, 1908, էջ 25:

⁷ В. И. Ш п и л ь к о в а. Младотурецкая революция 1908–1909 гг. М., 1977, с. 194.

էին դատական արգելքի տակ, գրկված էին իրենց քաղաքացիական իրավունքներից և կամ էլ օսմանյան հպատակությունից, ինչպես նաև կանայք, բանվորներն ու գյուղացիները:

Պատգամավորն իր լիազորությունները կորցնում էր մահվան, դատական արգելման, երկրից երկար ժամանակով բացակայելու և պետական պաշտոնի նշանակվելու դեպքում⁸:

Սուլթանական կառավարության կողմնակիցները փորձեցին խախտել պատգամավորների ընտրության կարգը և 1877 թ. նման այն փոխարինել պատգամավորներին վարչական խորհրդի անդամների կողմից կատարվող նշանակմամբ, որը կապահովեր խորհրդարանի արագ հրավիրումը և կսահմանափակեր երիտթուրքերի համախոհների ընտրության թվաքանակը⁹: Սակայն դա նրանց չհաջողվեց: Երիտթուրքերը հաճախակի էին հանդիմանում հայերին, ասելով, որ «Սահմանադրությունը դուք բերիք, ձեզի կը պարտինք...»¹⁰:

Ոգևորված այդ մտայնությամբ, դեռևս սահմանադրության հռչակման օրերին՝ 1908 թ. օգոստոսին, դաշնակցականներ Արամը, Սարգիսը, Կոմսը և Բշխանը հարց էին բարձրացրել Վան ժամանած Իթթիհատի ներկայացուցիչ Էոմեր Նաջիի առջև Արևելյան նահանգների ներկայացուցիչների համագումարի հրավիրման, պետական վարչական գործերի մեջ Իթթիհատի հետ վերահսկողության հաստատման, հողային վեճերի կարգավորման նպատակով հատուկ՝ խառը հանձնաժողովի ստեղծման և խորհրդարանական ընտրությունների ժամանակ Վանից, Էրզրումից և Տարսնից հայ թեկնածուների առաջադրման մասին¹¹: Հայերն իրավունք ստացան ընտրելու 10 երեսփոխան, որոնց թիվը հաջորդ ընտրությունների ժամանակ, որպես իթթիհատական կոմիտեի բացառիկ շնորհի հալերին, պիտի հասներ 13-14-ի¹²:

Եթե ընդունենք, որ հայերի թվաքանակը Օսմանյան Թուրքիայում 1908-1914 թթ. կազմում էր մոտավորապես 2-2,5 մլն, ապա իթթիհատականների գործելակերպն ամեննին էլ զիջում չէր և իրականում ներկայացնում էր նրանց անարդարությունը արևմտահայության հանդեպ: «Ամեն տարակույսե վեր է, - գրում էր Հ. Երամյանը, - որ ժեռն թուրքերու կամ իթթահատի ազատական ձգտումներու շարքին ներքև քողարկված կը մնար նեղ ազգայնական ոգի մը, որ միանգամայն զերծ չէր իսլամական մոլեռանդութենե և որուն պիտի միանային նաև համիսլամական և համաթուրանական ծրագիրները»¹³: Եթե «այդ մարմինը ամբողջապես պիտի կազմվի սուլթանների բացարձակ կամքի որոշմամբ, - ավելացնում է Ս. Մապահ-Գյուլյանը, - արդ, ո՞ր տրամադրությամբ, ո՞ր ազգերի համանման օրենքով չի կարելի եզրակացնել, որ ընտրված ձերակուտականները չեն լինի սուլ-

⁸ Տ ի գ ր ա ն Ջ ա վ ե ն նշվ. աշխ., էջ 25-26:

⁹ Архив внешней политики Российской империи (այսուհետև՝ - АВПРИ), ф. Канцелярия, МИД, 1908 г., д. 35, т. II, л. 311, նաև՝ R. Devereux. The First Ottoman Constitutional Period. Baltimore, 1963, p. 124.

¹⁰ Ե. Օ տ յ ա ն նշվ. աշխ., էջ 456:

¹¹ Արամը, մահվան հիսնամյակին առթիվ, Երևան, 1991, էջ 63-64:

¹² Հ. Եր ա մ յ ա ն. Հուշարձան Վան-Վասպուրականի, հ. Բ, Աղեքսանդրիա, 1929, էջ 105-106:

¹³ Նույն տեղում, էջ 106:

թաննների բացարձակ հլու, հնազանդ, հաճոյակատար ստրուկները, հետևաբար գահակալի իդեերի թարգմանը ու արտահայտիչը և ո՛չ թե ժողովրդի, որի անունով իրենք պիտի խոսեն, որոշում կայացնեն: Իրենց գոյությունը բռնապետին պարտական լինելով՝ նրանք բռնապետի էլ գործիքը պիտի լինեն դեպի այն ժողովուրդը, որից իրենք ո՛չ մի կախումն, որի հետ իրենք ո՛չ մի առնչություն ունենին: Օսմանյան այդ եզակի Օերակույտի մեջ հայկական ծագում ունեցող օսմանցիները – չէ՞ որ ամենքի ազգայնությունը օսմանյան պիտի լինի – ամենայն հավանականությամբ կունենան Տասյաններ, Նուրյաններ, Նորատունկյաններ – նստած Ջնդէտ, Մայիդ, Մահմուտ Ջալալեդդին փաշաների կողքին. Աշրգյաններ, Օրմանյաններ, Մամբրեններ – բազմած Ուլեմանների, Մուֆտիների և Շեյխու-Իսլամների կշտին»¹⁴:

Այդ էր պատճառը, որ սահմանադրության օրերին Անդրանիկ Օզանյանը գաղտնի մեկնեց Կ. Պոլիս և հանդիպեց Ռուբեն Չարդարյանին՝ փորձելով զգուշացնել նրան և նրա ընկերներին՝ օսմանյան երեսփոխանական ժողովի մեջ չմտնելու համար: Սակայն, ցավոք, ընդդիմության հանդիպեց¹⁵:

Համանման կարծիք էր հայտնում նաև Ռուբենը, որը 1908 թ. սահմանադրությունից հետո տեղափոխվում է Վան, իսկ այնտեղից՝ Կովկաս: Հավատ չընծայելով սահմանադրության նկատմամբ, նա առաջարկում էր խորհրդարանական գործունեությամբ շատ չոգևորվել և, օգտվելով սահմանադրության ընձեռած հնարավորությունից, արագորեն լծվել արևմտահայության զինման գործին: Դեռ ավելին, նա պահանջում էր երիտթուրքերից հետ ստանալ 1908 թ. Վանի զինապահեստներից մատնությամբ բռնագրավված զենքերը. «Եթե Սահմանադրական կառավարությունը վստահի և վերադարձնի, լավ, եթե չվերադարձնի, ուրեմն անվստահելի է, մենք ալ տարբերություն չպիտի դնենք հին ու նոր ռեժիմների միջև»¹⁶: Անկախ ամեն ինչից, Անդրանիկի հավաստմամբ, «...սկսան կռիվ մը թրքական խորհրդարանի աթոռները խլելու համար»¹⁷: Մ. Ավետյանի բնորոշմամբ՝ «երեսփոխանական աթոռներ գրավելու համար Պոլիս վազած էին ոչ միայն Վարդգեսներ և Տաղավարյաններ, այլև Ջեյթունի հերոս մեծն Մուրասներ և Պանք Օթոմանի «պոնպաճի» Կարո Բաստրմաճյաններ»¹⁸:

1908 թ. մեպուսական ընտրությունների ժամանակ Վանում իրար դեմ պայքարում էին ՀՅԴ, արմենական խմբակը՝ «չափավոր ազատականք» անվան տակ և «Թերզիբաշյան» խմբակը՝ կազմված վաճառական էֆենդիներից ու հին վարչակարգի թուրք պաշտոնյաներից: Մեպուսական և ազգային ընտրությունների առիթով սեպտեմբերից սկսած նախընտրական միտինգներ, հրապարակային ժողովներ, դասախոսություններ, ճառախոսություններ և տենդագին վիճարա-

¹⁴ Մ. Ս ա պ ա հ - Գ յ ու լ լ յ ա ն. Երիտասարդ Թյուրքիա, Պարիզ, 1908, էջ 28:

¹⁵ Մ. Ա վ ե տ յ ա ն. Հայ ազատագրական ազգային հիսնամյա (1870-1920) հուշամատյան և գրք. Անդրանիկ, վերլուծական հայեցողությամբ և վավերական տվյալներով, Փարիզ 1954, էջ 136:

¹⁶ Ռ ու բ ե ն. Հայ հեղափոխականի մը հիշատակները, հ. Ե, Լոս Անջելես, 1951, էջ 235, նաև՝ Ա. Ն եր ո ս ի ս յ ա ն. Ռուբեն, Երևան, 2007, էջ 127:

¹⁷ Ա. Ժ ա մ կ ո չ յ ա ն. Ջորավար Անդրանիկ կպատասխանե իր հակառակորդներուն, Փարիզ, 1945, էջ 21:

¹⁸ Մ. Ա վ ե տ յ ա ն. նշվ. աշխ., էջ 136:

նություններ տեղի ունեցան Վանի գերեզմանատներում, Կենտրոնական վարժարանում, բողոքականների ժողովարանում և նույնիսկ բաց դաշտի մեջ՝ պարզելու համար իրենց հիմնական պահանջները՝ հողային, հարկային, զինվորական և ընտանեկան հարցերի շուրջը և «ապագա երեսփոխանների «շնորհք»... երկինքեն աստղերը վար բերելու խոստումները...»¹⁹: Դասախոսություններով հանդես եկան դաշնակցական գործիչներ Դ. Մելոյանը, Մ. Թերլեմեզյանը, Արամը, Վ. Փափազյանը, Խլղաթյանը, Բժիշկը, Ա. Մաքսապետյանը, Սարգիսը, «խլու» Մարկոսը, Թնֆիկ էֆենդին և ուրիշներ²⁰: Ընտրական պայքարի օրերին միննույն բեմից փոխնիփոխ խոսում էին դաշնակցականները, սահմանադիր-ռամկավարները և հնչակյանները՝ ժողովրդի առաջ պարզելու համար իրենց պահանջներն ու ակնկալությունները: «Ամենքն էլ ժողովրդի բարեկամ են դարձել այսօր, – գրում է «Գործ» պարբերականը, – երբ վերջապես հարկավոր է շահագործել ժողովրդի բարեկամությունը բուն իսկ այդ ժողովրդի դեմ գործելու համար»²¹: Սակայն հերքողական, երբեմն նույնիսկ խիստ ճառերից հետո, կուսակցական ղեկավարները հաճախ եղբայրաբար իրար էին միանում²²:

Դաշնակցությունն իր կողմից կազմել էր ընտրական հատուկ մի հանձնախումբ, որը քարոզչություն էր ծավալում և թողուցիկներով պարզում սահմանադրության շուրջ եղող սկզբունքային ու գործնական հարցերը: Դաշնակցության շրջիկները, ցրված գավառներում և գյուղերում, պայքար էին մղում իրենց գաղափարների հաղթանակի համար²³:

Օսմանյան խորհրդարանի երեսփոխանական ընտրության ժամանակ դաշնակցության Վանի կենտրոնական կոմիտեն առաջարկեց Կոմսի՝ Վահան Փափազյանի թեկնածությունը՝ իբրև վանեցու, քանի որ օրենքով խորհրդարանի անդամ կարող էր ընտրվել միայն տեղացին: Բայց Կոմսը համաձայն չէր: «... Անախորժ անակնկալ մըն էր ինձի համար, – գրում է Կոմսը: – Երբեք միտքես անցած չէր նման պատասխանատվության տակ մտնել: Կը ըզգայի, որ անախորժ պարտականություն մըն էր՝ խառնվածքիս բացարձակ անհամապատասխան, մանավանդ, որ լեզուն ալ չէի գիտեր»²⁴: Միաժամանակ, նա գտնում էր, որ այդ պաշտոնի համար իր պատկերացումներով ամենահարմարը՝ Արամ Մանուկյանն էր՝ «իր հանդգնությամբ, խորհրդարանական միջավայրի շուտով հարմարող՝ իր մատչելի և անկաշկանդ բնավորությամբ, մանավանդ որ քիչ շատ ալ թյուրք-թաթարական լեզվով կրնար լավ-զեշ արտահայտվիլ»²⁵: Սակայն վերջինս էլ կտրուկ հրաժարվում է՝ տեղացի չլինելու պատճառով: Հետագայում Կոմսը, ցավով անդրադառնալով իր երեսփոխան ընտրվելու հարցին, կշտամբանքով վերհիշում էր Արամի մերժումը. «Այդ պարտականության (երեսփոխանի) մարդը Արամը կըրնար լինել: Ինչո՞ւ չընդունեց: Չէ՞ որ իր խառնվածքով,

¹⁹ Վ. Փ ա փ ա զ յ ա ն. Իմ հուշերը, հատոր երկրորդ, Պեյրութ, 1952, էջ 41:

²⁰ «Գործ» (Թիֆլիս), 25. X. 1908, նաև՝ Վ. Փ ա փ ա զ յ ա ն. Իմ հուշերը, էջ 42:

²¹ «Գործ» 20. IX. 1908:

²² Հ. Եր ա մ յ ա ն. նշվ. աշխ., էջ 122-123:

²³ «Գործ», 14. IX. 1908:

²⁴ Արամը, մահվան հիսնամյակին առթիվ, էջ 64:

²⁵ Վ. Փ ա փ ա զ յ ա ն. նշվ. աշխ., էջ 40-41:

աննկուն, համարձակ ու անկաշկանդ՝ համառ պայքարող մըն էր, որ իր թերի լեզվով իսկ կրնար խորհրդարանի բեմեն որոտալ բոցավառ խոսքեր՝ ուղղված պետության վարիչներուն, ներկայացուցչական աթոռներու վրա բազմած թուրք «երնեյիներուն», որոնցմե շատերու ձեռքերը հավանաբար մաքուր չէին հայերու արյունեն ու արցունքեն»²⁶:

Հնչակյանները, որոնց մի մասը «...երեսփոխանական ընտրություններուն առիթով իրենց համար պատիվ համարեցին «պլոք» կազմել դաշնակցականներուն հետ», պաշտպանում էին Վ. Փափազյանի թեկնածությունը²⁷: Միանալով դաշնակցականներին՝ նրանք վիժեցրին «պուրժուաներու», այսինքն՝ արմենականների թեկնածուներ Ավետիս Թերզիբաշյանի և բժիշկ Գալուստ Ասլանյանի ընտրությունը: Հնչակ-դաշնակցական խմբակցությունն առարկում էր, որովհետև Ավ. Թերզիբաշյանը չնայած թուրքերենի և ֆրանսերենի մեջ հմուտ էր ու իր հարստությամբ ազդեցիկ անձնավորություն էր Վանում, սակայն գուրկ էր հեղափոխական գաղափարներից և չէր կարողանա ժողովրդին հուզող խնդիրները հավատարմորեն ներկայացնել օսմանյան խորհրդարանում: Իսկ Գ. Ասլանյանը 20 տարուց ի վեր ապրելով Փարիզում և Սալոնիկում, անտեղյակ էր հայրենիքի ցավերին²⁸: Արդյունքում, արմենականների ու թերզիբաշյանների բլոկը սկսեց մերձենալ քուրդ և թուրք հետադեմ տարրերին:

Միաժամանակ, ժողովուրդը հավատացած էր, որ դաշնակցականները, որոնց օգտին քվեարկելու էին նաև թուրք, քուրդ և ասորի գյուղացիները, իրենց համար հող ու իսկական արդարություն կպահանջեին²⁹: Այդ մասին «Մշակ»-ը գրում է. «Դաշնակցությունը չունի արժանավոր ընտրելի, այս բոլոր վանեցիք գիտեն, բայց կը ջանա ույժով, գաղտնապես գյուղացոց քվեները հավաքել և վերջին բուպեին իր ընտրելիի (խոսքը՝ հնչակյան Մարտիրոս Նալբանդյանի մասին է, որը Իթթիհատի կուսակցության Վանի մասնաճյուղի անդամ էր – Ավ. Հ.) վրա կեղծանացնել: Այս բանը մեծ զգվանք առաջ կը բերե»³⁰:

Նախընտրական քարոզարշավի վերջում Հ. Երամյանի որբանոցը կազմակերպեց պաշտոնական հանդես, որին մասնակցեցին Վանի կուսակալը, Վանի թուրքական գործերի հրամանատարը, Վանի ռուսական հյուպատոս Ս. Օլֆերնը և բարձրաստիճան այլ պաշտոնյաներ:

1908 թ. սեպտեմբերին (այլ տեղեկություններով՝ նոյեմբերի 15-ին) տեղի ունեցան օսմանյան խորհրդարանի (դեպուտատների պալատի) առաջին աստիճանի պատվիրակային ընտրություններ: Վասպուրականը բաժանված էր 47 ընտրական շրջանների, որոնցից՝ 10-ը՝ քաղաքում, իսկ 37-ը՝ գավառներում³¹: Նահանգը (Հեքիարիի մյութեսարիֆության հետ) ներկայացնում էր 83 000 ձայնատու, որից 29 000-ը հայեր էին:

²⁶ Նույն տեղում, էջ 40:

²⁷ Ա. Դ ա ր բ ի ն յ ա ն. նշվ. աշխ., էջ 180:

²⁸ Հ. Ե ր ա մ յ ա ն. նշվ. աշխ., էջ 110:

²⁹ «Գործ», 7. X. 1908, նաև՝ «Մշակ», 14. XI. 1908:

³⁰ «Մշակ», 28. IX. 1908:

³¹ «Գործ», 17. IX. 1908:

Ընտրություններում հաջողություն ապահովելու համար երիտթուրքերը կայսրության տարբեր շրջաններ ուղարկեցին իրենց ներկայացուցիչներին, որոնց նպատակն էր տեղերում ստեղծել «Միություն և առաջադիմություն» կուսակցության մասնաճյուղեր ու ապահովել իրենց թեկնածուների հաղթանակը: Էրզրում, Վան, Մուշ, Բիթլիս, Մոսուլ, Դիարբեքիր, Դամասկոս և Բեյրութ մեկնեց Սալոնիկի կոմիտեի անդամ, գլխավոր շտաբի մայոր Վեհիբ փաշան³²:

Երիտթուրքերն ու քրդերը մեծ ջանք գործադրեցին նաև ընտրական խարդախություններ կազմակերպելու ուղղությամբ, որպեսզի Վասպուրականի նման հայաշատ նահանգից հայ պատվիրակներ չընտրվեին օսմանյան պառլամենտի մեջ: Նրանք գյուղերը խմբավորում էին այնպես, որ թուրքերը, չնայած այս կամ այն շրջանում փոքրամասնություն լինելուն, ընտրության ժամանակ ստանում էին առավելություն: «Վանի մեջ ընտրական գործողությունները մինչև վերջին օրերը, ուր մեր ընտրելիի հաջողությունը կասկածի տակ էր, անօրինակ զեղծումներու թատերաբեմ դարձած էին»³³: Ինչպես Վ. Փափագյանն է նշում, «Երեսփոխանական հապճեպ ընտրություններու ստեն Իթթիհատի հետ մեր բանակցություններու արդյունքը շատ գոհացուցիչ չէր: Անոնք ներքնապես հրահանգած էին սահմանափակել քրիստոնյա ընտրելիներու թիվը: Վասպուրականը, հայ ազգաբնակչության թվի համեմատությամբ, կրնար երեք երեսփոխան տալ, մինչդեռ հազիվ մեկը ունեցավ: Նույն և Տարոնը: Բաղեշը՝ ոչ մեկ»³⁴:

Վանում կատարված ընտրական կոպիտ խախտումների պատճառով թուլալատվեց անցկացնել կրկնակի ընտրություններ³⁵: Վասպուրականից նախապես իրավունք էր տրված ընտրելու մեկ հայ և մեկ թուրք երեսփոխան: Սակայն ընտրվեցին երեքը³⁶: Թուրքերի կողմից առաջադրված 8 պատվիրակներից՝ որպես Վանի թուրք պատգամավորներ ընտրվեցին երկուսը՝ առաջադիմական ճանաչված Սերվետ էֆենդին³⁷ և տեղացի կալվածատեր Թիմուրզադե Թնֆիկ էֆենդին, որը տարիքով մի կիսազրագետ անձնավորություն էր՝ մեղմ բնավորությամբ³⁸:

«Ձախջախիչ» մեծամասնությամբ Վասպուրականի կողմից Օսմանյան խորհրդարանի հայ պատգամավոր ընտրվեց Վահան Փափագյանը, որը խոշոր հաղթանակ տարավ հատկապես գավառներում: Այդ մասին նա հետագայում հիշում է. «Մերիները հրճվանքի մեջ էին, իսկ ես տխուր ու մտատանջ էի՝ իմ առջև բացվող այս նոր, անձանոթ և անախորժ կյանքին հանդեպ»³⁹: Այս հաղթա-

³² Центральный государственный военно-исторический архив РФ, ф. 2000, оп. 1, г. 6948, л. 32, 40, նաև՝ д. 6862, л. 48.

³³ Ե. Օ տ յ ա ն ն (Ե թ ո տ). Ընկեր Փանջունի Վասպուրականի մեջ, Ընկերվարական նամականի ընկեր Բ. Փանջունիե, Վենետիկ – Ս. Ղազար, 1959, էջ 89:

³⁴ Վ. Փ ա փ ա գ յ ա ն ն. նշվ. աշխ., էջ 90:

³⁵ АВПРИ, ф. 121, ф. Посольство в Константинополе, д. 1595, л. 117.

³⁶ В.И. Ш п и л ь к о в а. Նշվ. աշխ., էջ 199:

³⁷ Հ. Ե թ ա մ յ ա ն ն. նշվ. աշխ., էջ 110:

³⁸ Վ. Փ ա փ ա գ յ ա ն ն. նշվ. աշխ., էջ 40:

³⁹ Նույն տեղում, էջ 42:

նակը, Ա. Դարբինյանի իրավացի համոզմամբ, արդյունք էր «դաշնակցականներու և իթթիհատականներու միջև գոյացած համագործակցության»⁴⁰:

Վ. Փափագյանը՝ բնիկ վանեցի և երախտավոր ուսուցիչ Տեր Մեսրոպ քահանա Փափագյանի որդին, մեծ համակրանք էր վայելում ժողովրդի լայն խավերի մեջ, ուստի և ներկայացավ որպես անմրցակից թեկնածու ու ժողովրդանվեր հեղափոխական: Վ. Փափագյանը, որն անկարող էր թուրքերենով արտահայտվել (նրա թարգմանիչն էր Դավիթ Փափագյանը), մասնակցում էր միայն խորհրդարանի բարենորոգումների հանձնաժողովի աշխատանքներին և ձգտում էր հարաբերություններ հաստատել միայն այլ ազգությունների հեղափոխական երեսփոխանների հետ⁴¹: Կարծում ենք, որ նրա նկատմամբ չէր կիրառվել սահմանադրությամբ նախատեսված թուրքերեն լեզվի իմացության պարտադիր պայմանը:

Քվեարկության օրը մեծաշուք տոնակատարության կերպարանք ստացավ Վանի կուսակալը հանդիսավոր ճաշկերույթ կազմակերպեց ընտրված երեսփոխանների պատվին:

Վանից մեկնելու նախօրյակին Վ. Փափագյանը մեծ խոստումներ էր շնայում բոլորին: «Մենք, ձախակողմյան երեսփոխաններս, – ասում էր նա, – պատենեջի վրա պիտի կանգնենք և կուրծք պիտի տանք դեպի ժողովուրդը, դեպի հասարակական իրավունքները, դեպի արդարություն ուղղված հարվածներին»⁴²: Բայց նա նշանավոր եղավ միայն իր լռությամբ, այնպես որ շատերի կողմից արժանացավ «համր երեսփոխան» տիտղոսին⁴³:

Ազգային, կուսակցական և կառավարությանը առաջադրվելիք մի շարք խնդիրներ մշակելուց հետո, Վ. Փափագյանը Ալաշկերտի, Թիֆլիսի, Բաթումի վրայով մեկնեց Կ. Պոլիս: Ահա թե ինչպես է իր հրաժեշտի պահը ներկայացնում Վ. Փափագյանը. «Վան քաղաքը հայ և թյուրք – ոտքի վրա է: Զինվորական և քաղաքացիական իշխանությունը բերդին էտն, Ավանց նավահանգիստի ճամբուն վրա, հրաժեշտի հանդես էր կազմակերպած: Զինվորական նվազախումբ, հայերեն-թյուրքերեն ձառեր, օդին մեջ նետված հրահանգներ, բարեմաղթություններ և, մանավանդ, երդումներ, թե ամբողջ ժողովուրդը պատրաստ է «մինչև իր արյան վերջին կաթիլը զոհելու սահմանադրության պաշտպանության համար»... սնամեջ ու հազար անգամ կրկնված անկատար խոստումներ»⁴⁴:

Մեպուսանի մեջ աթոռներ բաշխվեցին նաև Օսմանյան կայսրության այլ վայրերի քրիստոնյաներին: Օսմանյան խորհրդարանում հայ երեսփոխանները ներկայացնում էին հետևյալ պատկերը. Կ. Պոլսից՝ Գրիգոր Զոհրապը և Պետրոս Հալաջյանը, Իզմիրից՝ Ստեփան Սպարթալյանը (Սպարթալ) և Հակոբ Պապիկյանը, Գոզանից՝ Համբարձում Պոյաջյանը (Մուրադ), Էրզրումից՝ Գարեգին Փաստրմաճյանը (Արմեն Գարո) և Վարդգեսը, Մուշից՝ Գեղամ Տեր-Կարապետ-

⁴⁰ Ա. Դարբինյան. նշվ. աշխ., էջ 180:

⁴¹ Հ. Երասմյան. նշվ. աշխ., էջ 115:

⁴² «Մշակ», 17. VI. 1912:

⁴³ Նույն տեղում:

⁴⁴ Վ. Փափագյան. նշվ. աշխ., էջ 42-43:

յանը, Սեբաստիայից՝ դոկտոր Նազարեթ Տաղավարյանը, Վանից՝ Վահան Փափազյանը:

Հետագայում՝ 1912 թ., խորհրդարանի հայ պատգամավորների թիվը հասավ 18-ի. այդ թվում՝ Կ.Պոլսից՝ Պետրոս Հալաջյանը և Գրիգոր Զոհրապը (չեզոք), Կարինից՝ Գարեգին Փաստրմաճյանը, Հովսեփ Մատաթյանը և Վազգեն Սերանկույանը, Բզմիրից՝ Ստեփան Սպարթայանը, Օնիկ Իսսանը և Վահան Պարտիզպանյանը, Սեբաստիայից՝ դոկտոր Նազարեթ Տաղավարյանը, Տիգրան Պարսամյանը և դոկտոր Փաշայանը, Մարզվանից՝ Կարապետ Թամայանը, Ռոտոսթոյից՝ Հակոբ Պապիկյանը, Էդիրնեից՝ Հակոբ Պոյաջյանը, Գոգանից՝ Մատթեոս Նալբանդյանը և Համբարձում Պոյաջյանը, Մուշից՝ Գեղամ Տեր-Կարապետյանը, Վանից՝ Վահան Փափազյանը⁴⁵:

Սկզբնական շրջանում պառլամենտի բացումը նախատեսվում էր 1908 թ. նոյեմբերին: Սակայն նախընտրական գործընթացը, որը շարունակվեց մոտ երեք ամիս, ձգձգվեց Սակեդոնիայում, Ալբանիայում և արաբական շրջաններում սկիզբ առած հուզումների պատճառով: Ի վերջո, 1908 թ. դեկտեմբերի 4-ին (17-ին) 101 թնդանոթների որոտով և մեծ հանդիսավորությամբ Ստամբուլում՝ Արդարադատության նախարարության շենքում, իր աշխատանքները սկսեց թուրքական երկրորդ խորհրդարանը⁴⁶, որի հանդիսավոր նիստը բացեց Աբդուլ Համիդ II-ի առաջին քարտուղար Ալի Ջևադ բեյը: Վերջինս ներկայացրեց սուլթանի զեկույցը, որտեղ փորձում էր իրեն հեռու պահել 1878 թ. խորհրդարանի ցրման պատասխանատվությունից: Այնուհետև սուլթանն անձամբ շնորհավորեց երեսփոխաններին՝ խորհրդարանի աշխատանքների սկսման կապակցությամբ⁴⁷:

Խորհրդարանի նախագահ ընտրվեց տարագրությունից վերադարձած երիտթուրքերի գաղափարական ու տնտեսական ղեկավար, «ազատական մտքի վերերաններեն»՝ Ահմեդ Ռիզա բեյը⁴⁸: Խորհրդարանի բացումը մեծ արձագանք գտավ ինչպես մայրաքաղաքում, այնպես էլ նահանգներում: Շատ քաղաքներում տեղի ունեցան հանրահավաքներ և ռազմական շքերթներ: Այդ օրը Վանում փակվեցին դպրոցները, երեկոյան կազմակերպվեցին լուսավառություններ և մի մեծ հանրահավաք հրավիրվեց բողոքական ժողովարահի մեջ՝ հայերի և թուրքերի մասնակցությամբ: Ելույթ ունեցողները՝ Ֆերիկ Մահմուդ փաշան, Բժիշկը, Միհրան Թերլեմեզյանը, Ղևոնդ Սրվանձտյանը, Արշակ Վոսմյանը և ուրիշներ «ազդու և հուզված շեշտերով» ցույց տվեցին «ազատության՝ մեր երազներից երազի

⁴⁵ Հ. Եր ա մ յ ա ն. նշվ. աշխ., էջ 109:

⁴⁶ Թուրքական առաջին խորհրդարանի բացումը տեղի էր ունեցել դեռևս 1877 թ. սկզբներին՝ 237 պատգամավորի մասնակցությամբ, որոնցից 13-ը՝ հայեր էին: Այն ժամանակ հայ պատգամավորական խումբն ուներ հետևյալ պատկերը՝ Վիչեն էֆ. Հոլաս (Ղալաթիա և Թոփանե), Ստեփան փաշա Ասլանյան (Սկյուտար), Սերվիչե էֆ., Հովհաննես էֆ. Ալլահվերդի, Սեպուհ բեյ Մաքսուդ, Միսոն բեյ Մաքսուդ, Ալեքան էֆ. Մաքայան, Հակոբ էֆ. Գազազյան, Ռուբեն էֆ., Մանուկ էֆ. Խարաճյան (Կարին), Համազասպ էֆ. Պալարյան (Կարին), Հակոբ էֆ. Շահինյան (Սեբաստիա), Հակոբ էֆ. Ֆրենկյան (Ադանա)⁴⁶: Խորհրդարանը գոյատևեց մինչև 1878 թ. փետրվարի 2-ը, որից հետո այն ցրվեց. տե ս Ե. Թ ո փ չ յ ա ն. Երիտասարդ Թյուրքիան և հայերը, մասն առաջին, Թիֆլիս, 1909, էջ 205:

⁴⁷ В. И. Ш п и л ь к о в а. Նշվ. աշխ., էջ 201:

⁴⁸ Հ. Եր ա մ յ ա ն. նշվ. աշխ., էջ 111:

իրականանալը...»⁴⁹: Հայերը, այցելելով թուրքական ակումբ, շնորհավորեցին երկրորդ խորհրդարանի բացումը:

Չնայած երկրում տիրապետում էր օսմանիզմի քաղաքականությունը, սակայն այն որոշակի ազդեցություն չունեցավ խորհրդարանական երկրորդ ընտրությունների ժամանակ: Ինչպես Անդրե Մանդելշտամն է նշում, «պետք է ընդունիլ սակայն թե այս նոր տրամադրությունները (խոսքը օսմանիզմի=օսմանցիականության սկզբունքի մասին է.– Ավ. Հ.) չափազանց զորավոր անդրադարձում մը չունեցան առաջին օսմանյան խորհրդարանին մեջ, ոչ – թուրք տարրին ունեցած ներկայացուցչության վրա»⁵⁰:

Ընտրությունների արդյունքում ձևավորվեց խորհրդարան, որը բաղկացած էր՝ Սենատից և երեսփոխանական պալատից: Պահպանված բազմաբնույթ տեղեկությունները հնարավորություն չեն տալիս ներկայացնելու խորհրդարանի պատգամավորների ճշգրիտ թվաքանակը՝ ազգային և դասակարգային կազմի առումով, որի արդյունքում պատմագիտական գրականության մեջ շրջանառվում են հակասական տվյալներ:

Սենատը բաղկացած էր 53 հոգուց⁵¹: Սենատի անդամների 2/3-ը ընտրված էր, իսկ 1/3-ը՝ սուլթանի կողմից նշանակված: Ազգային պատկանելության առումով Սենատում տեղերը բաշխված էին հետևյալ կերպ՝ 41 թուրք, 4 հույն, 3 հայ, 2 հրեա, 1 բուլղարացի և 1 ուլահ (վալախ)⁵²: Օսմանյան երկրորդ խորհրդարանի առաջին ընտրության արդյունքում թուրքերը մեծամասնություն կազմեցին: Պատվամեծների 266 պատգամավորներից 220-ը մահմեդականներ էին, 125-ը՝ թուրքեր, 70-ը (ըստ Ա-Դոյի՝ 60-ը)⁵³՝ արաբներ, 25-ը՝ ալբանացիներ: Մնացած 46 պատգամավորները՝ քրիստոնյաներ և հրեաներ էին, որից 23-ը՝ հույներ, 10-ը (ըստ Ա-Դոյի՝ 12-ը)⁵⁴ հայեր, 4-ը՝ բուլղարներ, 4-ը՝ հրեաներ, 3-ը՝ սերբեր և 1-ը՝ վալախ⁵⁵:

Ըստ Ա. Մանդելշտամի՝ 275 երեսփոխաններից 60-ը՝ արաբներ էին, 25-ը՝ ալբանացիներ, 23-ը՝ հույներ, 12-ը՝ հայեր, 5-ը՝ հրեաներ, 4-ը՝ բուլղարացիներ, 3-ը՝ սերբեր և 1-ը՝ վալախ: Խորհրդարանի 275 պատգամավորների գրեթե կեսը՝ 133-ը, կազմված էր ոչ թուրքերից⁵⁶: Մայրաքաղաքի մեջ ընտրվեց 5 թուրք, 2 հույն, 2 հայ և 1 հրեա⁵⁷: Ըստ Ա. Սարրուի՝ երեսփոխաններից 120-ը՝ թուրքեր էին, 70-ը՝ արաբներ, 23-ը՝ հույներ, 20-ը՝ ալբանացիներ, 10-ը՝ հայեր, 4-ը՝ հրեաներ, 4-ը՝ բուլղարացիներ, 3-ը՝ սերբեր, 1-ը՝ վալախ⁵⁸: Ըստ Բ. Զի-

⁴⁹ «Գործ», 19. XII. 1908:

⁵⁰ Ա. Մ ա ն մ է լ ա թ ա մ. Օսմանյան կայսրության ճակատագիրը և հայկական հարցը, առաջին մաս, Կ. Պոլիս, 1919, էջ 39:

⁵¹ A. G a u v a i n. L'Europe au jour le jour, vol. I–II. Paris, 1917, p. 229.

⁵² A. S a r r o u. La jeune Tarquie et la revolution. Paris, 1912, p. 43.

⁵³ Ա - Դ ո յ. Մեծ դեպքերը Վասպուրականում 1914-1915 թվականներին, Երևան, 1917, էջ 36:

⁵⁴ 10-րդ թեկնածուն իթթիհատական կուսակցության ներկայացուցիչ Հակոբ Պապիկյանն էր, որը սպանվեց Ադանայի կոտորածներից հետո:

⁵⁵ Վ. Փ ա փ ա զ յ ա ն. նշվ. աշխ., էջ 90-91:

⁵⁶ Ա - Դ ո յ. նշվ. աշխ., էջ 36:

⁵⁷ Ա. Մ ա ն մ է լ ա թ ա մ. նշվ. աշխ., էջ 39:

⁵⁸ A. S a r r o u. La jeune Tarquie et la revolution, p. 46.

նովնի՝ երեսփոխաններից 46-ը՝ արաբներ էին, 26-ը՝ այբանացիներ, 23-ը՝ հույներ, 10-ը՝ հայեր, 4-ը՝ բուլղարացիներ, 3-ը՝ սերբեր, 3-ը՝ հրեաներ⁵⁹: Ըստ Վ. Միլլերի՝ երեսփոխաններից 18-ը՝ հույներ էին, 4-ը՝ բուլղարացիներ, 2-ը՝ սերբեր, 2-ը՝ հրեաներ, 1-ը՝ հայ⁶⁰: Ըստ Ա. Կուրանի՝ երեսփոխաններից 142-ը՝ թուրքեր էին, 60-ը՝ արաբներ, 25-ը՝ այբանացիներ, 23-ը՝ հույներ, 12-ը՝ հայեր, 5-ը՝ հրեաներ, 4-ը՝ բուլղարացիներ, 3-ը՝ սերբեր և 1-ը՝ վալախ⁶¹: Իսկ ըստ Ահմադ Ֆերոզի՝ 275 երեսփոխաններից 147-ը՝ թուրքեր, 60-ը՝ արաբներ, 27-ը՝ այբանացիներ, 26-ը՝ հույներ, 14-ը՝ հայեր, 10-ը՝ սլավոններ և 4-ը՝ հրեաներ⁶²:

Օսմանյան պառլամենտում ապահովվեց նաև շահագործող վերնաշերտերի (խոշոր կալվածատերերի և խոշոր ու միջին բուրժուազիայի) մեծամասնությունը: Պառլամենտի պատգամավորների 35 %-ը կրոնավորներ (սարքզիներ) էին, 30 %-ը՝ կալվածատերեր, 20 %-ը՝ պաշտոնյաներ, 10 %-ը՝ ազատ արհեստի ներկայացուցիչներ և 5 %-ը՝ անորոշ մասնագիտության անձինք⁶³: Մոլանների մեծագույն մասը քրիստոնյատյաց էին և տգետ, իսկ մահմեդական կալվածատերերի 80%-ը՝ գրեթե անգրագետ: Պառլամենտում աննշան էր աշխատավոր բնակչության ներկայացուցիչների թիվը⁶⁴:

Երիտթուրքերը միջոցներ չձեռնարկեցին արգելելու համար այլ կուսակցություններին պատկանող թուրք երեսփոխանների ընտրությունը:

Ըստ կուսակցական պատկանելության, պատգամավորներից 160-ը (այլ աղբյուրների համաձայն՝ 150-ը)⁶⁵ իթթիհատականներ էին, 20–25-ը (ըստ Ա. Մանդելշտամի՝ 10-ը)⁶⁶՝ լիբերալներ-ապակենտրոնականներ («Ախրար» կամ «Ատաւր մերքեզիեթ» կուսակցությունից) 4-ը՝ դաշնակցականներ, 2-ը՝ բուլղար «կուրբիստ»-ներ, 1-ը՝ սոցիալ-դեմոկրատ և 70-ը՝ անկուսակցականներ⁶⁷: Այդ է եղել պատճառը, որ խորհրդային թուրքազիտական գրականության մեջ նշվի, որ «... հավաքված Մեջլիսի կազմում հայ տասներկու դեպուտատներից հինգը... կազմում էին թուրքական երկրորդ պառլամենտի սոցիալիստական խումբը»⁶⁸:

Կրթական մակարդակով, իհարկե, բարձր էին քրիստոնյա երեսփոխանները: Հույներից շատերն ունեին բարձրագույն կրթություն: Նրանց մեջ կային բժիշկ, փաստաբան և պրոֆեսոր: Հայերից հինգն ունեին համալսարանական բարձրագույն կրթություն: Ինչպես Գր. Ջոհրապյան է ներկայացնում, «Օսմ. հայ երեսփո-

⁵⁹ АВПРИ, ф. Политархив, д. 3084, л. 154.

⁶⁰ W. M i l l e r. The Ottoman Empire and its Successors, 1801-1922. Cambridge, 1923, p. 479.

⁶¹ A. K u r a n. Osmanleimparatorluğunda inkilâp hareketlerine milli mücadele. İstanbul, 1956, p. 432.

⁶² A h m a d F e r o z. The Young Turks. The Committee of Union and Progress in Turkish Politics, 1908-1914. Oxford, 1969, p. 28.

⁶³ Վ. Փ ա փ ա զ յ ա ն. նշվ. աշխ., էջ 90-91:

⁶⁴ Ա. Հ ա մ բ ա ը յ ա ն. Երիտթուրքերի ազգային և հողային քաղաքականությունը, Երևան, 1979, էջ 14:

⁶⁵ Մ. Ա. Հ ա ս ռ ա թ յ ա ն, Մ. Ֆ. Օ թ է շ կ ն վ ա, Յ Ն Լ. Ա. Պ է տ ը ն յ ա ն. Թուրքիայի պատմության ուրվագծեր, Երևան, 1986, էջ 209:

⁶⁶ Ա. Մ ա ն տ է լ ա թ ա մ. նշվ. աշխ., էջ 39:

⁶⁷ Վ. Փ ա փ ա զ յ ա ն. նշվ. աշխ., էջ 93:

⁶⁸ Հ. Գ. Բ ն ճ ի կ յ ա ն. Օսմանյան կայսրության անկումը. սոցիալ-տնտեսական ակնարկ, Երևան, 1984, էջ 228:

խանները անհատական արժանիքի տեսակետով ուրիշ Օսմ. երեսփոխաններեն ետ չեն մնար, եթե չեն գերազանցեր զանոնք...»⁶⁹:

Երեսփոխանական ժողովի ճանաչված անդամներ դարձան Գր. Ջոհրապր, Վարդգեսը, Պ. Հալաջյանը, Ն. Տաղավարյանը և ուրիշներ: Հայ երեսփոխաններ մասնակցել են հատկապես տնտեսական, դատական, կրթական և այլ օրենքների մշակմանը: Սակայն հայ երեսփոխանները, մեծամասամբ լինելով նախկին հեղափոխականներ, արքայականներ, չեզոք կամ էլ Իթթիհատի կողմից թելադրված գործիչներ, չկարողացան ժողովրդի շահերի պաշտպանության միացյալ ճակատ կազմել և հայ ազգային դիմագիծը ներկայացնել խորհրդարանի մեջ, քանի որ «միշտ պաշտպան հանդիսացած են Սահմանադրական ոգիին, հավատարմով այդ կերպով լավագոյն պաշտպանությունը կատարած ըլլալ ոչ միայն իրավակարգին, այլ կայսրության ընդհանուր շահերուն, ինչպես հայության շահերուն»⁷⁰: Բացի այդ, մոտ 300 հոգուց բաղկացած խորհրդարանում ի նչ կշիռ պիտի ունենար նրանց կարծիքը, երբ միայն 3–4 հոգի կհամարձակվեին խոսել մաքուր թուրքերենով: Վ. Փափագյանի հավաստմամբ՝ «Մեր և քրիստոնյա մյուս երեսփոխաններու դժբախտությունը պետական լեզվի անձանդությունն է. այդ պատճառով լուր ու մունջ ունկնդրի դերի մեջ էինք, առանց նույն իսկ հասկնալու մոլաներու արաբախառն և «գիտուններու» խոսած տաղտկալի ճառերու բովանդակությունը: Հայերու մեջ փայլուն թրքազետ հոետորը Ջոհրապր էր և խոսելու կարողութենե ոչ գուրկ Հալաճյանը. մյուսները իրենց լվացքը կրնային ջուրեն հանել կոպիտ կամ թերի թյուրքերենով: Ամենեն խեղճը ես էի և մասամբ Գարոն, ան խորհրդարանեն դուրս գոնե կրնար հասկնալ ինքզինքը: Մտածեցի և որոշեցի աշակերտի դերի մեջ մտնալ և թյուրքերեն դասեր առնել: Հայտնի Ստեփան Կուրտիկյանն էր իմ ուսուցիչը՝ վարպետ թյուրքերենի, արաբերենի և պարսկերենի»⁷¹: Կար նաև մեկ այլ դժվարություն. դա խորհրդարանական հետադեմ միջավայրն էր: «Եվ կը կարծե՞ք, – գրում է Գր. Ջոհրապր, – միթե որ դյուրին է երեսփոխանի պաշտոնը Օսմ. Խորհրդարանին մեջ. կը կարծե՞ք որ հոն կրոնամուլական, հին գաղափարներով տարված հոսանքներ չի կան: Պետք է մոտեն ճանչնալ Օսմ. Խորհրդարանը՝ գիտակցաբար դատելու համար հայ երեսփոխանին դժվարին և ապերախտ վաստակն ու հոգնությունները»⁷²: «Ամեն պարագայի տակ մեր ընտրյալները՝ այսօրվան ունեցած իրենց իրավունքներով պիտի կրնան թերևս շատ գեղեցիկ ցանկություններ հայտնելու, սակայն պայմանավ որ այդ ցանկությունները գուրկ լինին ո՞ր և է վճռական նշանակութենե: Որովհետև, ինչպես ձեզ ալ հայտնի է, մեր սահմանադրության գործությամբ կա ուրիշ հաստատություն մը, ուր նստած են մեզմեն չընտրված և մեր հավաքական կամքը չը ներկայացնող քանի մը հոգի, որոնք իրավունք ունին մեր երեսփոխաններու ըսածին վրա խոշոր խաչ մը քաշելու, եթե իրենց հաճելի չը թվի: Իսկ անոնց (խոսքս ծերակուտականներու մասին է) հաճելի չեն այն բոլորը, ինչ որ ուժեղի

⁶⁹ Գր. Ջոհրապր ալ. Հայ պատգամավորի մը հաշվետվությունը, Կ. Պոլիս, 1910, էջ 19:

⁷⁰ Լ. Չոբանյան. Համապատկեր Արևմտահայոց մեկ դարու պատմության, հ. Գ (1908-1922), Պեյրուք, 1975, էջ 65:

⁷¹ Վ. Փափագյան. նշվ. աշխ., էջ 91:

⁷² Գր. Ջոհրապր ալ. նշվ. աշխ., էջ 20:

շահերուն դեմ և հասարակության շահերուն ի նպաստ են... Եթե նույնիսկ պատահի, որ այս կամ այն խնդրի շուրջը համաձայնություն մը կայանա մեր ընտրած երեսփոխաններուն և վերեն նշանակված ձերականոյտի անդամներուն միջև, այդ պարագային ալ տակավին կա ամենագոր ձեռք մը, որ իրավունք ունի խաչը քաշելու եղած որոշման վրա»⁷³:

Խորհրդարանում իթթիհատական պատգամավորներից աչքի էին ընկնում Ահմեդ Ռիզա բեյը (Ստամբուլ), Միդհատ Շյուքրի բեյը (Սերա), Թալեաթ բեյը (Էդիրնե), Հաֆիզ Իբրահիմ էֆենդին (Բայեկ), Հաբիբ բեյը (Բուլու), Մեհմեդ Ջավիդ բեյը (Սալոնիկ) և Մանիյասիգադե Բեֆիկ բեյը (Ստամբուլ)⁷⁴: Երիտթուրքերը խորհրդարանում կազմեցին իրենց խմբավորումը, որի օգնությամբ «Միություն և առաջադիմություն» կուսակցությունը նպատակ ուներ իրականացնելու հսկողությունը խորհրդարանի գործունեության վրա և աստիճանաբար նվաճելու օրենսդիր իշխանությունը: Խորհրդարանական խմբավորման ղեկավար դարձավ կուսակցության կենտրոնական կոմիտեի անդամ Թալեաթ բեյը:

Իթթիհատի երեսփոխան ընտրված անդամները, մասնավոր և հատուկ երդումով պարտավոր էին ենթարկվել կենտրոնական կոմիտեին և ճշտորեն կատարել նրա հրամանները. «Անոնք նոյն իսկ չէին կրնար թողուլ կուսակցությունը, առանց «որոշ վտանգումի» մը ենթարկվելու... գումիթեն կրնար վստահ ըլլալ Միություն և Հառաջադիմություն կուսակցության խորհրդարանական հատուածին անդամներուն բացարձակ հավատարմությանը...»⁷⁵:

Իթթիհատի մյուս գործիչները չմտան կառավարության կազմի մեջ: Նրանք հրամայողի ու հսկողի ֆունկցիաներ իրացրին դրսից, որի արդյունքում ձևավորվեց յուրատեսակ մի երկիշխանություն⁷⁶:

«Միություն և առաջադիմություն» կուսակցությունը Սալոնիկից տեղափոխվեց Ստամբուլ:

Մինչև 1909 թ. մարտի 31-ը Իթթիհատը «ինքնավստահ հանդգնությամբ» իրեն զգում էր խորհրդարանի տերը, «ակներև կերպով կ'արհամարհեր անկախ մտածողները կամ սաղմնային վիճակի մեջ եղող հոսանքները. Իթթիհատի թմրկահարներու մատերը կը որոշեին ամեն հարց»⁷⁷: Իհարկե, կարգապահության և միատարրության մասին խոսք լինել չէր կարող. «քվեարկություններու ատեն դժվար էր զանազանել՝ ով որո՞ւ քվե կուտար...»⁷⁸: Հետագայում թուրք մտավորական երեսփոխանները, անհան-

⁷³ Հ. Արամյան ց. Ազատություն քաղաքական և տնտեսական, ատենախոսություն (արտասանված Կ. Պոլսո Կետիկ-Բաշա թաղը գումարված միթինկին մեջ, 10/23 սեպտեմբեր 1908), Կ. Պոլիս, 1908, էջ 15:

⁷⁴ В. И. Шпилькова. Նշվ. աշխ., էջ 200:

⁷⁵ Ա. Մանտեղիա մ. նշվ. աշխ., էջ 40, նաև՝ А. Н. Мандельштам. Младотурецкая держава. Историко-политический очерк. М., 1915, с. 12.

⁷⁶ В. И. Шпилькова. Նշվ. աշխ., էջ 127, 262:

⁷⁷ Վ. Փափազյան. նշվ. աշխ., էջ 93:

⁷⁸ Նույն տեղում:

դուրժելի համարելով Բթթիհաստի միահեծանությունը, լքեցին Բթթիհաստը և հանդես եկան իբրև ընդդիմադիր կուսակցություն՝ «Ախրար» անունով, որը հետագայում կոչվեց «Հուրրիեթ վե իթիլաֆ» («Ազատություն և համաձայնություն») և հարեց իշխան Մապահետտինի ապակենտրոնացման քաղաքականությանը:

Առաջին նստաշրջանի վերջում «կուսակցական շերտավորումների» արդյունքում օսմանյան պառլամենտը ձեռք բերեց ուժերի հետևյալ դասավորությունը. իթթիհաստականների թիվը իջավ՝ հասնելով 85-90-ի, կրոնավորների նոր կուսակցությունը՝ «Ջեմիյեթը իլմիյե»-ն («Գիտունների ընկերություն»)՝ 25-30, «Ախրար»-ը՝ 55-60, անկուսակցականները՝ 90-100: Իսկ 1909 թ. մարտի 31-ի հեղաշրջման ձախողումից հետո խորհրդարանն ուներ հետևյալ պատկերը, Բթթիհաստ՝ 125-130, դաշնակցականներ՝ 4, հնչակյաններ՝ 1, սոցիալ-դեմոկրատներ՝ 1, բուլղար «կլուբիստ»-ներ՝ 2⁹: Իսկ մնացած «անկուսակցական» պատգամավորները՝ թվով 80 մոլլաներ (ուլեմներ), որոնց մեծ մասը անդամակցում էր «Ջեմիյեթը իլմիյե»-ին, գործում էր Շարիաթի օրենքներով:

ПРЕДВЫБОРНАЯ БОРЬБА В ВАНЕ И ВТОРЫЕ ПАРЛАМЕНТСКИЕ ВЫБОРЫ 1908 Г. В ОСМАНСКОЙ ТУРЦИИ

АВЕТИС АРУТЮНЯН

Р е з ю м е

10 июля 1908 г. султан Абдул Гамид II снова внес в действие Мидтатскую конституцию 1876 г. Приказ султана о проведении выборов был опубликован 2 августа 1908 г. В Ван-Васпуракане началась предвыборная борьба. В сентябре 1908 г. произошли парламентские выборы, в связи с чем от Вана были выбраны 3 депутата, в том числе, член Армянской революционной партии «Дашнакцутюн» Ваан Папазян.

THE PRE-ELECTION STRUGGLE IN VAN AND THE SECOND PARLIAMENTARY ELECTIONS IN OTTOMAN TURKEY IN 1908

AVETIS HARUTYUNYAN

S u m m a r y

On July 10, 1908, sultan Abdul Hamid II again put into action the Mithat Constitution from 1876. Due to sultan's order the elections were to take place on August 2, 1908. There was organized pre-election struggle in Van-Vasporakan. In September, 1908 the elections took place and three candidates from Van were elected to the Parliament. The member of the Armenian Revolutionary Party "Dashnaksutyun" Vahan Papazyan was one of them.

⁷⁹ Նույն տեղում, էջ 94: